

საბჭოთა კავშირის ჩემპიონატი ფეხბურთში

"დინამო" (თბილისი) – "შახტიორი" (დონეცკი) 2:1 (1:1)

თბილისი, ვ. ი. ლენინის სახელობის "დინამოს" სტადიონი, 3 მაისი

"დინამო" გაბელაია, კეტაშვილი, ცხადაძე, ჭეღია, კაჭარავა, თედევი (თეთრაძე 64), ჯიშკარიანი, ცვება, ცაავა, ქეცბაია (არზიანი, 46), გოგიჩაიშვილი.

"შახტიორი" მიხაილოვი, დრაგუნოვი, როლევიჩი, სერდიუკი, ესეევი, ლეონოვი, იაშჩენკო, კობოზევი, ოტპალი (გომკოდერია 60), სეისტუნი (სობკო, 70), გრაჩოვი.

მსაჯი მ. იოფე (მოსკოვი).

დუბლიორები – 2:0.

შეხვედრის დაწყების წინ მაცურებელმა და ფეხბურთელებმა წუთიერი დუმილით პატივი მიაგეს 9 აპრილს თბილისში ტრაგიკულად და მთიან აჭარაში სტიქიური უბედურებისაგან დაღუპულთა ხსოვნას, აქვე სტადიონზე გამოცხადდა, რომ თბილისის "დინამოს" ფეხბურთელები და გუნდის ხელმძღვანელობა მხარს უჭერს გადაწყვეტილებას რესპუბლიკაში საერთაშორისო წითელი ჯვრის ორგანიზაციის წარმომადგენელთა მოწვევასთან დაკავშირებით.

ამ მძიმე დღეებში საქართველოს ტელევიზიისა და პრესის ფურცლებიდან, ქართველი ერის წარმომადგენლები გამოსვლას ერთი განცხადებით იწყებდნენ, – კერძოდ, თუ რა მძიმეა მათთვის გამოსვლა ფართო, აუდიტორიის წინაშე ასეთი უბედურების ჟამს. ახლა წარმოვიდგინოთ თბილისის "დინამოს" ფეხბურთელთა მდგომარეობა...

დონეცკის "შახტიორთან" უმაღლესი ლიგის ყველა გუნდს უჭირს თამაში. ჩვენი ფეხბურთელების სასარგებლოდ უნდა ითქვას, რომ ამ მძიმე მატჩს ისინი მორალურადაც და ფსიქოლოგიურადაც მომზადებულნი შეხვდნენ.

დასაწყისშივე ნათელი შეიქმნა, რომ მასპინძლები მხოლოდ გამარჯვებისთვის იბრძობებდნენ. პირველსავე წუთებზე დონეცკელებმა რამდენიმე სახიფათო იერიში მოიგერიეს, მეხუთე წუთზე თავიანთ საჯარიმოში სტუმრები კეტაშვილის ინდივიდუალური გარღვევა უხეში ილეთით შეაჩერეს გოგიჩაიშვილის მიერ დარტყმულმა 11 მეტრიანმა მიზანს მიაღწია – 1:0. არც გატანილი ბურთის შემდეგ შეუწყვეტიათ იერიშები მასპინძლებს – პირველი ნახევრის დასაწყისი მათი **სათამაშო** და ტერიტორიული უპირატესობით მიმდინარეობდა. დონეცკელები კი კონტრშეტევებით ფიქრობდნენ მიზნის მიღწევას. ამიტომაც იყო, რომ მთელ მოედანზე "შახტიორის" სწრაფ თავდამსხმელებს დინამოელები პერსონალურად მეურვეობდნენ, ცნობილია, დონეცკელები გაძლიერებული მეთვალყურეობის ქვეშაც ახერხებენ ნებისმიერ გუნდის კართა შექმნას საგოლე მომენტები. ამ მხრივ არც ეს მატჩი ყოფილა გამონაკლისი, შეხვედრის 25–ე წუთზე, როდესაც მცველთა მეცდომის შემდეგ ბურთი გრაჩოვს დარჩა, ყველას ეგონა, რომ იგი დრიბლინგით შეეცდებოდა კართან მიახლოვებას, მაგრამ გრაჩოვმა შესანიშნავად შეაფასა სიტუაცია და თითქმის ოცდაათი მეტრის მანძილიდან უძლიერესი დარტყმით აღადგინა წონასწორობა – 1:1. გატანილი ბურთის შემდეგ სტუმრებმა მკვეთრად მოუმატეს ტემპს, თუმცა სერიოზული საფრთხე მასპინძელთა კართან ვეღარ შექმნეს თბილისელთა იერიშები კი სულ უფრო სახიფათო გახდა, კარის აღების კარგი შესაძლებლობა ჰქონდათ გოგიჩაიშვილს, ქეცბაიას, კაჭარავას, მაგრამ გადაწყვეტი დარტყმები ან მიზანს სცდებოდა, ან მეკარე მიხაილოვი იყო მოწოდების სიმაღლეზე, მე–40 წუთზე ჭეღია–თედევის ლამაზად გათამაშებული კომბინაციის შემდეგ ცაავა პირისპირ დარჩა "შახტიორის" კარის დარაჯთან. გოლკიბერი ცრუ მოძრაობით მოატყუა და მიხაილოვს ისლა დარჩენოდა ხელით შეეჩერებინა თავდამსხმელი მატჩის არბიტრმა მ. ხოფემ მეორე 11 მეტრიანი დანიშნა გოგიჩაიშვილის დარტყმა ამჯერად ზედა ძელმა მოიგერია.

47–ე წუთზე კაჭარავა სწრაფად გაერკვა "შახტიორის" კართან შექმნილ არეულობაში და ახლო მანძილიდან ძლიერი დარტყმით წინ გაიყვანა თავისი გუნდი – 2:1, დარჩენილ დროში თბილისელებს შეეძლოთ გაეზარდათ ანგარიშში სხვაობა, მაგრამ რთულ სიტუაციაში კვლავ უშეცდომოდ თამაშობდნენ დონეცკელთა მცველები და მეკარე მიხაილოვი. ჩემპიონატის მორიგ შეხვედრას ჩვენი გუნდი ერევანში "არარატთან" 14 მაისს გამართავს.

"შახტიორთან" მატჩის მთლიანი შემოსავალი 9 აპრილის ტრაგედიის მსხვერპლთა მემორიალის ფონდში გადაირიცხა.

"ლელო" 6 მაისი 1989 წ.